

Script Of Evening Gojri News Bulletin 02 July 2024 at 1700 Hrs

ایوننگ گو جری نیوز بلیٹن مورخہ 02 جولائی 2024

یوہ آکا شوانی جموں ہے محمد مبارک ماہر تے محمد اکرم چودھری تیں خبر سُنو۔ پہلاں
خاص خاص خبر۔

*1- وزیر اعظم نریندر مو دی نے قومی جمہوری اتحاد این ڈی اے غا ارکین پارلیمان تیں
پارلیمانی جمہوریت گا اصولاں نانہ برقرار رکھن تے چنگا طور طریقاں غو مظاہرو
کرن بارے اپیل کی ہے۔

*2- وزیر اعظم نریندر مو دی لوک سبھا مانہ دوہاں ایواناں گا سانجھا اجلاس مانہ صدر۔
جمہوریہ غا خطاب ور شکر یہ غی تحریک غو جواب دے رہیا ہیں۔

*3- لیفٹنٹ گورنر منوج سنہا نے محرم غا سلسلہ مانہ انتظامات غو جائزولین خاطر اک
اعلیٰ سطحی میٹنگ غی صدارت کی۔ افسران، ڈپٹی کمشراں تے ایس ایس پیان نانہ ہدایت
دتی جے وے شیعہ برادری گا منیا پڑمنیا تے مذہبی رہنماواں نال اُن گا مسئلاں غا حل با
رے بیٹھک کریں۔

*4- تے شمالی کشمیر غا ضلع کپواڑہ مانہ اج حفاظتی دستاں غی طرفوں اک تلاشی
مہم غے دوران اسلحو تے گولی سکو برآمد کیو۔

خبراں غی تفصیل نال پہلاں محمد مبارک ماہر۔

PM NDA

وزیر اعظم نریندر مو دی نے نویں دہلی مانہ قومی جمہوری اتحاد غی پارلیمانی
جماعت غا پہلا اجلاس مانہ ارکان پارلیمان ور زور دتو کے وے پارلیمانی اصولاں ور
کار بند رہیں۔ جمہوری اصولاں نانہ برقرار رکھیں تے نال ہی اچھا اخلاق غو مظاہرو
کریں۔ اُن نے اس گل ور زور دتو کہ قوم غی خدمت کرنو ہر رکن پارلیمان غی اولین ذمہ
داری ہے۔ پہاویں وہ جماعت سنگ تعلق نہ رکھتو وے۔ وزیر اعظم نریندر مو دی نے
ارکان پارلیمان نانہ پانی، ماحولیات تے سماجی شعباں مانہ مہارت پیدا کرن غی ترغیب
دتی۔ اُنہاں نے ارکان پارلیمان نانہ اہل خانہ غے نال پردھان منتری سنگھالیہ غو دورو
کرن غی وی دعوت دی۔ جس مانہ تمام وزرائے اعظم گا سفر غی غیر جانبدارانہ تصویر
کشی کی گئی ہے۔ پارلیمانی امور غا وزیر کرن رجیجو نے نامہ نگاراں سنگ گل کرتاں
واں مناسب طرز عمل ور وزیر اعظم نریندر مو دی غی رہنمائی ور لو کہلی۔ قومی جمہو
ری اتحاد این ڈی اے غا ارکان نے وزیر اعظم نریندر مو دی نانہ لگاتار تیجی وری
وزیر اعظم بنن ور مبارکباد دی۔

Par Motion of thanks

وزیر اعظم نریندر مو دی لوک سبھا مانہ صدر جمہوریہ درویدی مُرمو غا خطاب ور دوہاں
ایواناں غی سانجھی بیٹھک ور شکر یہ غی تحریک ور جوابدے رہیا ہیں۔ تے وے اس ضمن
مانہ پلک راجیہ سبھا مانہ وی جواب دیں گا۔ اس گل غی اطلاع پارلیمانی امور غا وزیر
کرن رجیجو نے نویں دہلی مانہ این ڈی اے غا پارلیمانی اجلاس تیں بعد دی۔ جد کہ اج پار
رلیمان غا دوئے ایواناں نے صدر غا خطاب ور شکر یہ تحریک ور دوبارہ تبادلہ خیال شروع
کیو۔

Motion of thanks LS

لوک سبھا مانہہ دوہاں ایوانان لوک سبھا تے راجیہ سبھا غا سانجھا اجلاس مانہہ صدر جمہوریہ درویدی مُرمو غا خطاب ور شکریہ غی تحریک ور جا ری تبادلہ خیال ور بولتاں واں سماج وادی پارٹی گا رُکن پارلیمان اکھلیش یا دُو نے کہیو کہ موجودہ سرکار غے کول اکثریت نہیں اور یاہ انڈیا اتحاد غی جت ہے۔ اپنی تقریر غے دوران جناب یا دُو نے بھارتی معیشت ور سوال چاتاں واں کہیو کہ بھارت دُنیا غی 5 ویں بڑی معیشت ہے ور انفرادی طور ر ور اس غی آمدن اجوں وی ہموار نہیں۔ اس تیں علا وہ مذکورہ پارلیمانی رُکن نے پیپر لیک غا معاملہ ور الزام لاتاں واں کہیو کہ سرکار نوجواناں نانہہروز گا ر نہیں دینو چاہتی۔ اُت بی جے پی غا پارلیمانی رُکن سنتوش پانڈے نے گذشتہ روز حزب اختلاف غا قائد راہل گا ندھی غا تبصرہ ور سوال چایا۔ اُتے راجیہ سبھا مانہہ بحث غے دوران اے جی پی جماعت غا رُکن بریندر پرساد بھائی شیا نے آسام مانہہ گُجھ برادریاں نانہہ درجہ فہرست قبیلہ مانہہ شامل کرن ور مسئلو چایو۔ اُن نے ریاست آسام گا مقامی لوکاں غی پشان غا تحفظ بارے ضرورت ور قدم چان غے نال نال غیر قانونی طور نقل مکانی غا مسئلہ نانہہ وی اُجاگر کیو۔ جناب بھائی شیا نے آسام مانہہ آیا سیلاب نانہہ قومی مسؤل قرار دین غی مانگ کی۔ شیرومنی آکالی دل غی رُکن ہر سمرت کو ربادل نے مطالبو کیو کہ کساناں گا مسائل نانہہ تولاں ہی حل کیو جانو چاہیے۔ موصوفہ نے پنجاب مانہہ منشیات جیسی لعنت غو وی معاملو چایو۔ اے آئی ایم آئی ایم غا صدر اسد الدین اویسی نے بے روزگاری تے قانون سازی مانہہ مسلماناں غی کہٹ نمائندگی بارے معاملو چایو۔ کانگریس غا گورؤ گگوٹی نے آسام مانہہ حالیہ سیلاب بارے معاملو چاتاں واں سرکار ور زور دتو جے ریاست مانہہ بچاؤ کاروائی کاظر ایس ڈی آر ایف غی ٹیم چلائی جائیں۔ جناب گگوٹی نے مزید کہیو کہ حالیہ لوک سبھا چناؤ تیں لوکاں نے اک مضبوط حزب اختلاف چُنی ہے۔ اس تیں علا وہ آزاد سماج پارٹی غا چندر شیکھر نے ذات پات غی مردم شماری کران غو مطالبو کیو۔ یاد رہے جے بی جے پی غا اجے بھٹ نے کانگریس تیں عوام غے خلاف ہون آلا مظالم ور سوال چاتاں واں الزام لایو جے کانگریس آئین نانہہ پامال کر رہی ہے۔ مزید بحث اجاں وی جاری ہے۔

Parl Lalan Singh

مرکزی وزیر تے جے ڈی یو رہنما راجیو رجن سنگھ عُرف للن سنگھ نے اج لوک سبھا مانہہ حزب اختلاف غا رہنما راہل گا ندھی غا گذشتہ روز غا تبصرہ ور تنقید کی ہے۔ اُنہاں نے الزام لاتاں واں کہیو کہ راہل گا ندھی غی تقریراں مانہہ قول تے فعل غو فقدان تھو۔ اُن نے کہیو کہ راہل گا ندھی نے قائد حزب اختلاف غو اک بہت ہی اہم عہدو سنبھالیو ہے تے اُن غی تقریر عوامی جلساں مانہہ کرن آلاں نال مشابہت رکھے۔ جناب سنگھ نے یوہ وی الزام لایو کہ حقائق پیش کرن غے بجائے راہل گا ندھی محض الزامات غو ہی سہارو لیں۔

Reddy Mines Exhibition

کان کنی بارے وزیر جی کشن ریڈی نے وزیر مملکت ستیش چندر دوبے غے نال اج نوی دہلی شاستری بھون مانہہ ضلعی کان کنی فاؤنڈیشن گیلری ڈی ایم ایف غو افتتاح کیو۔ یاہ شہ نشین اپنی منظم سماجی ذمہ داری غے تحت کان کنی کرن آلی کمپنیاں غا تعاون سنگ تیار کردہ خودی امداد گروپ غی مصنوعات غا مشاہدہ غی اک نمائش ہے۔ جناب ریڈی خود

امدادی گروپاں غے ذریعے پیدا کر دہ دیسی اشیاء غی تعریف کی۔ میڈیا سنگ گل کرتاں واں اُن نے کہیو کہ ڈی ایم ایف بارے اقدام وزیر اعظم نریندر مو دی غا نظریہ غے مطابق ہیں۔ جنہاں نے کان کنی غی سرگرمیاں تیں متاثر لوکاں غی بھلائی بہتری بارے کوششاں غی ہدایت کی ہے۔ اُن نے نکر کرتاں واں کہیو کہ بھارت غا 650 تیں متا ضلع ہیں جن نانہہ باختیار بنان بارے خاص توجو دتی گئی ہے۔ وزیر موصوف نے مشاہدو کرتاں واں کہیو کہ قریب 18 ہزار منصوبہ مکمل ہو چکا ہیں تے نال ہی یقین دھانی کرائی کہ اُن آلا تہاڑاں مانہہ اس نوعیت غا مزید ترقیاتی کم جاری رہیں گا۔

CJI Courts

عدالتِ عظمیٰ غا سربراہ ڈی وائی چندر چُڈ نے اج عدلیہ غا بنیا دی اصولاں غا طور ور انصاف تے برابری غی بنیا دی اقدار ور زور دتو کر کر ڈما مانہہ 3 عدالتی عمارتاں غی تعمیر واسطے نی پتھر رکھن غی تقریب سنگ خطاب کرتاں واں چیف جسٹس نے کہیو کہ عدالتی دربار محض ایٹاں تے پتھراں نال نہیں بناویو جا تو بلکہ لوکاں غی امید ان تے آساں ور تعمیر کیو جائے۔ اُن نے کہیو کہ عدالت لوکاں نانہہ قانون غے ذریعے حکمرانی غو احساس دوان غا سلسلہ مانہہ بنائی گئی ہیں۔ نہ کہ اپنی مرضی غا فیصلاں واسطے۔ مذکورہ تقریب مانہہ دہلی غی عدالتِ عالیہ غا منصف منموین، عدالتِ عظمیٰ غی ہیما تے جسٹس امان اللہ سمیت لیفٹنٹ گورنر دہلی وی کے سکسینہ تے عوامی کماں کاجاں بارے وزیر آتیشی وی موجود تھا۔

یہ خبر تم آکاشوانی جموں تیں سن رہیا ہیں خبراں غا باقی حصہ محمد اکرم چودھری۔

LG Muharram

لیفٹنٹ گورنر منوج سنہا نے اج سول سیکریٹریٹ سرینگر مانہہ محرم الحرام بارے انتظامات غو جائزولین واسطے اک اعلیٰ سطحی میٹنگ غی صدارت کی۔ لیفٹنٹ گورنر نے ڈپٹی کمشنراں، ایس ایس پی صاحبان تے عہدیداراں نانہہ ہدایت دتی کہ شیعہ برادری غا سرکردہ ارکان تے مذہبی رہنماواں سنگ میٹنگ کریں تا کہ اُن گا مسائل نانہہ تولاں ہی حل کیو جاسکے۔ جس تیں محرم الحرام خوش اسلوبی سنگ منایو جائے۔ لیفٹنٹ گورنر نے ضلع انتظامیہ نانہہ ہدایت دتی کہ وے امام بارگاں تک سڑکاں نانہہ بہتر بناویں۔ اس تیں علاوہ بغیر کسی کٹوتی غے بجلی، پانی غی فراہمی راشن غی پیشگی تقسیم تے ضرورت غے مطابق دیگر سہولیات نانہہ یقینی بنان واسطے اقدام چاویں۔ لیفٹنٹ گورنر نے بازار غو باقاعدہ معائنو کرن تے ضروری اشیاء تے طبی خدمات غی دستیابی نانہہ یقینی بنان ور زور دتو۔

Arms & Ammunition

حفاظتی دستاں نے اج شمالی کشمیر غا ضلع کپواڑہ مانہہ تلاشی مہم غے دوران اسلحو تے گولی سکو برآمد کیو ہے۔ ذریعاں غے مطابق کپواڑہ پولیس غی طرفوں خاص سولن ور حفاظتی دستاں غی طرفوں عام علاقہ ننگری جنگل تے درد پورہ کراں پورہ مانہہ تلاشی کاروائی غو آغاز کیو گیو۔ اُن نے دسیو جے مذکورہ تلاشی کاروائی غے دوران اسلحہ، گولی سکہ تے دھماکہ خیز مواد غے نال اک رسد لی۔ جس مانہہ 8 اے کے میگزین، 4 سو 45 اے کے گولیں، اک پستول، 3 پستول میگزین، 13 پستول غی گولی تے 1 ہتھ گولو موجود تھو۔

Kausar Nag Yatra

وادی کشمیر غی بلندی ور واقع کوثر ناگ جھیل تک 4 تہاڑاں ور مشتمل سالانہ کوثر ناگ یا ترا 7 جولائی تیں شروع وے گی۔ اس جھیل نانہ بہت سارا زائرین بھگوان سنگ جوڑیں۔ ڈپٹی کمشنر ریا سی و شیش مہاجن نے کہیو جے کوثر ناگ یا ترا 7 جولائی تیں شروع وے گی۔ یا درہ جے جنوبی کشمیر غا ضلع کلگام مانہ واقع کوثر ناگ جھیل غی یا ترا غو آغاز 2010 مانہ ضلع ریا سی غا مقامی لوکاں غا اک گروپ نے کیو تھو۔ ڈپٹی کمشنر ریا سی و شیش مہاجن نے اس طرح کہیو۔۔ باٹ۔۔

SCO Meet

شہنگائی تعاون تنظیم گا سربراہان مُلکاں غی کونسل غو 24 واں اجلاس قارقستان غی صدرت مانہ 4 جولائی نانہ منعقد وے گو۔ وزارتِ خارجہ نے کہیو جے کہ مذکورہ سربراہی اجلاس مانہ قائدین تیں توقع ہے کہ وہ پچھلی دو دہایاں مانہ تنظیم غی سرگرمیاں غو جائزولین غا تے ریا ستی اور کثیر جہتی تعاون غا امکان ور تبادلہ خیال کریں گا۔ اس اجلاس مانہ علاقائی تے عالمی اہمیت غا اہم امور ور وی گل بات متوقع ہے۔ وزارت نے مزید دسیو جے شہنگائی تعاون تنظیم مانہ بھارت غی ترجیحات وزیر اعظم نریندر مو دی غا سکیور ایس سی او غا نظریہ تیں تشکیل پاوے۔ واضع رہ جے بھارت نے پچھلے سال 4 جولائی نانہ مذکورہ تنظیم غا 23 واں اجلاس غی اک ورچول طریقے میزبانی کی تھی۔

HADP Reasi

ضلع ریا سی غا 12 بلاک غی بکھ بکھ پنچائتاں مانہ گذشتہ روز مجموعی ذرعی ترقی پروگرام غے تحت کسان سمپرک اہیان 3.0 غی شروعات کی گئی۔ اس مہم غو آغاز ڈپٹی کمشنر غی ہدایت ور کیو گیو۔ جہیڑا جے ایچ اے ڈی پی گا چیرمین وی ہیں۔ ڈائریکٹر ذراعت جموں نے مذکورہ پروگرام غی نگرانی غی کیونجے وے اس پروگرام غا نگران افسر ہیں۔ کسان رابطہ مہم 3.0 غو مقصد مجموعی کھیتی باڑی ترقی با رے پروگرام با رے بیداری پیدا کرنو تے کا شتکار برادری غی فلاح و بہبود خاطر مذکورہ پروگرام غے تحت کمان غا نفاذ مانہ تیزی آننو ہے۔ اس قسم غی تربیت اج ضلع غا 12 مقامات ور اک ہی ویلا مانہ منعقد کی گئی۔ متعلقہ محکمہ غی طرفوں کساناں نانہ بکھ بکھ سُنن تے دیکھن آلا آلات غے ذریعے تربیت دتی جا رہی ہے۔ تربیتی پروگرام مانہ شرکت کرن آلا کساناں غو متعلقہ ملازمین غے ذریعے بنیادی سروے کیو جا رہیو ہے۔ واضع رہ جے مذکورہ تربیتی پروگرام مانہ افسران تے اہلکاراں غے علاوہ کساناں غی بڑی تعداد نے شرکت کی۔

اس غے نال ہی خبراں غو یوہ بلیٹن ختم ہوؤ۔